

帝王世紀 世本 逸周書 古本竹書紀年

齊魯書社

帝王世紀 世本 逸周書 古本竹書紀年

齊魯書社

## 圖書在版編目 ( C I P ) 數據

帝王世紀 世本 逸周書 古本竹書紀年 / (晉) 皇甫謐等撰; 陸吉等點校. — 濟南: 齊魯書社, 2010. 1  
ISBN 978-7-5333-2336-3

I. 帝… II. ①皇…②陸… III. 帝王—史料—中國—古代 IV. K204

中國版本圖書館CIP數據覈字 (2009) 第218783號

## 帝王世紀 世本 逸周書 古本竹書紀年

---

出版發行 齊魯書社

社 址 濟南經九路勝利大街 39 號

郵 編 250001

網 址 [www.qlss.com.cn](http://www.qlss.com.cn)

電子郵箱 [qlss@sdpress.com.cn](mailto:qlss@sdpress.com.cn)

印 刷 山東新華印刷廠德州廠

開 本 850 × 1168 / 32

印 張 14.125

插 頁 3

字 數 355 千

版 次 2010 年 1 月第 1 版

印 次 2010 年 1 月第 1 次印刷

標準書號 ISBN 978-7-5333-2336-3

定價: 35.00 元

---

# 帝王世紀


[晉] 皇甫謐 撰

陸 吉 點校



## 目 錄

帝王世紀第一	自開闢至三皇 .....	1
帝王世紀第二	五帝 .....	10
帝王世紀第三	夏 .....	21
帝王世紀第四	殷商 .....	29
帝王世紀第五	周 .....	38
帝王世紀第六	秦 .....	52
帝王世紀第七	前漢 .....	55
帝王世紀第八	後漢 .....	58
帝王世紀第九	魏 .....	61
帝王世紀第十	星野 歷代墾田戶口數 .....	63
帝王世紀附錄	.....	68
帝王世紀補遺	.....	69
帝王世紀續補序	.....	70
帝王世紀續補	.....	71
帝王世紀考異	.....	80
校點後記	.....	90



## 帝王世紀第一 自開闢至三皇

天地未分，謂之太易。元氣始萌，謂之太初。氣形之始，謂之太始。形變有質，謂之太素。太素之前，幽清寂寞，不可為象。惟虛惟無，蓋道之根。道根既建，由無生有<sup>①</sup>。太素質始萌，萌而未兆，謂之龐洪，蓋道之幹。既育萬物成體，於是剛柔始分，清濁始位<sup>②</sup>。天成於外而體陽，故圓以動，蓋道之實。質形已具，謂之太極<sup>③</sup>。《御覽》一。

①“由”，一作“猶”，通“由”。 ②“位”，一作“立”，古通。 ③按：太易、太初、太始、太素之說，見《列子·天瑞篇》、《易乾鑿度》。又《易稽覽圖》推《易》天地人之元術云：“先置天元太初癸巳元年，一百九十萬八千八百五十三歲，乃始太初元年已來載數。”其言天元太初者，謂元氣始萌之太初也。言太初元年者，謂漢之太初也。蓋自元氣之萌，而已有可推之數。《御覽》又引《禮斗威儀》曰：“二十九萬一千八百四十歲而反太素。”《禮含文嘉》曰：“推之以上元為始，起十二月甲子朔旦夜半冬至，日月五星俱起牽牛之初。”鄭注：“上元太素已來至所求年。”據此，知太初、太始、太素已來俱有年可求，故《世紀》叙之於首。

天皇大帝，曜魄寶。地皇為天一，人皇為太一。《五行大義》五。

天子，至尊之定名也。應神受命，為天所子，故謂之天



子。故孔子曰：“天子之德，感天地、洞八方<sup>①</sup>。是以功合神者稱皇，德合天地稱帝，義合者稱王”<sup>②</sup>。《御覽》七十六。

①“洞”，一作“動”。 ②按：《藝文類聚》十一引作“仁義合者稱王”。

又按《公羊·成八年》注引孔子曰：“德合天地者稱帝，河洛受瑞可放。仁義合者稱王。”此“義”上當有“仁”字，本《春秋說》也。

功合神者稱皇。德合地者稱帝。德合人者稱王。《初學記》九。

太昊帝庖犧氏，風姓也<sup>①</sup>。蛇身人首，有聖德，都陳<sup>②</sup>。作瑟三十六弦<sup>③</sup>。燧人氏沒，庖犧氏代之，繼天而王，首德於木，為百王先。帝出於震，未有所因，故位在東方主春，象日之明，是稱太昊。制嫁娶之禮，取犧牲以充庖厨，故號曰庖犧。後世音謬，故或謂之宓犧<sup>④</sup>。一號黃熊氏<sup>⑤</sup>。在位一百一十年<sup>⑥</sup>。

①按：《初學記》引此，下有“有景龍之瑞，故以龍紀官”十字。 ②《路史·後紀一》引作“天皇伏羲都陳留”。 ③按：《初學記》引此，下有“長八尺一寸”。 ④原注：“一解云：宓，古伏字。後誤以宓為密，故號曰密犧。”按：“宓”，一本作“密”，注兩“宓”字并作“慮”字，皆誤。《初學記》引一解兩“宓”字亦作“慮”。《後漢·班固傳》注引作“後或謂之伏羲”。

⑤按：《五行大義》引作“雄黃氏”。《路史·後紀》曰：“皇雄氏，《世紀》云：一作雄皇。” ⑥《御覽》七十八引作“《皇王世紀》”。

包羲亦號天皇。《路史·後紀》一。

取犧牲以供庖厨，食天下<sup>①</sup>，故號曰庖犧氏。或作宓戲氏者，宓字誤也<sup>②</sup>。當山下著宓<sup>③</sup>，是古之伏字。《禮記·月令》正義。

①《班固傳》注引作“以食天下”。 ②按：二“宓”字皆當作“密”。

③按：“山”當作“宓”。

太皞帝庖犧氏，風姓也，母曰華胥。燧人之世，有大入

之迹出於雷澤之中，華胥履之，生庖犧於成紀。蛇身人首，有聖德，為百王先。帝出於震，未有所因，故位在東，主春，象日之明，是以稱太皞，一號黃熊氏。同上。《尚書·序》正義。《史記》索隱補《三皇紀》。

伏羲氏仰觀象於天，俯觀法於地，觀鳥獸之文與地之宜，近取諸身，遠取諸物，於是造書契以代結繩之政，畫八卦以通神明之德，以類萬物之情。所以六氣、六府、五藏、五行、陰陽、四時、水火升降，得以有象。百病之理，得以有類。乃嘗味百藥而制九針，以極夭枉焉。《御覽》七百二十一。

庖犧作八卦，神農重之為六十四卦，黃帝、堯、舜引而申之，分為二易。至夏人因炎帝曰《連山》，殷人因黃帝曰《歸藏》，文王廣六十四卦，著九六之爻，謂之《周易》。《初學記》廿一。《御覽》六百九。

伏羲葬南郡。或曰：冢在山陽高平之西也<sup>①</sup>。《三皇紀》。

<sup>①</sup>按：《路史·後紀》引此云：“葬南郡，在襄陽。”

太昊在位一百一十年，子孫五十九姓，傳世五萬餘歲。《唐文粹·陳鴻〈大統紀序〉》。

女媧氏，亦風姓也。承庖犧制度<sup>①</sup>。亦蛇身人首，一號女希，是為女皇。其末諸侯有共工氏，任智刑以強，伯而不王。以水承木，非行次，故《易》不載。及女媧氏沒，次有大庭氏、柏皇氏、中央氏、栗陸氏、驪連氏、赫胥氏、尊盧氏、渾混氏、昊英氏、有巢氏、朱襄氏、葛天氏、陰康氏、無懷氏，凡十五世，皆襲庖犧之號<sup>②</sup>。《禮記》正義一。《初學記》九。《御覽》七十八。

<sup>①</sup>《藝文類聚》十一引此文無此五字，有“作笙簧”三字。 <sup>②</sup>《三皇紀》注曰：“按：三皇說者不同，譙周以燧人為皇，宋均以祝融為皇，而鄭

依《春秋緯》以女媧為皇承伏羲，皇甫謐亦同。”按：女媧襲庖犧制度，故雖為皇而不自為一代。

神農氏，姜姓也。母曰任姒<sup>①</sup>，有喬氏之女，名女登，為少典妃。游於華陽，有神農首感女登於尚<sup>②</sup>羊，生炎帝，人身牛首，長於姜水，因以氏焉。有聖德，以火承木，位在南方，主夏，故謂之炎帝。都於陳，作五弦之琴。凡八世：帝承、帝臨、帝明、帝直、帝來、帝衰、帝榆罔。《御覽》七十，又七十八。

①《冊府元龜》作“任巳”。 ②一作“常”。

炎帝神農，母曰任姒，有嶠氏女，名女登，少典妃。游華陽，有龍首感之，生神農於裳羊山。一曰：少典取莽水氏女，曰聽訛<sup>①</sup>，生帝臨魁。《御覽》百三十五。

①音妖。

位南方主夏，故曰炎帝。作耒耜，始教民耕農。嘗別草木，令人食穀以代犧牲之命，故號神農，一號魁隗氏，是為農皇。《五行大義》五。

炎帝初都陳，又徙魯。《五帝紀》索隱。

魁隗氏又曰連山氏，又曰列山氏。又。

炎帝神農氏長於江水，始教天下耕種五穀而食之，以省殺生。嘗味草木，宣榮療疾，救夭傷人命。百姓日用而不知，著《本草》四卷。《御覽》七百廿一。

神農氏本起於烈山，或時稱之<sup>①</sup>。據《禮記·祭法》正義校增。一號魁隗氏，是為農皇。或曰：炎帝時，諸侯夙沙氏叛不用命<sup>②</sup>，炎帝退而修德，夙沙之民自攻其君而歸炎帝。營都於魯，重八卦之數，究八八之體為六十四卦。在位百二十年而崩，葬長沙<sup>③</sup>。《御覽》七十八。

①按：《三皇紀》注曰：“鄭玄云：厲山，神農所起，亦曰有烈氏。皇甫謐曰厲山，今隨之厲鄉也。”②《藝文類聚》十一引此，下有“箕文諫而殺之”六字。③《三皇紀》曰：“按：《國語》，炎帝、黃帝皆少典之子，其母又皆有嬌氏之女。據諸子及《古史考》，炎帝之後凡八代，五百餘年，軒轅氏代之。豈炎帝、黃帝是昆弟而同母氏乎？皇甫謐以為少典有嬌氏諸侯國號。然而姜、姬二帝同出少典氏，黃帝之母又是神農母氏之後代女，所以同是有嬌氏之女也。”

在位百二十年而崩。至榆罔凡八世，合五百三十年①。《初學記》九。

①《路史·後紀》曰：“《春秋命歷序》炎帝八代，五百三十年。《古今通系》、《世紀》等，并因乎此。”

蚩尤氏強，與榆罔爭王於涿鹿之野。《御覽》五十六。

榆罔居空桑，空桑為陳留，故《歸藏》啟筮云：蚩尤伐空桑①，帝所居也。《路史·後紀》四。

①按：此十一字後人所增。

炎帝戮蚩尤於中冀，名其地曰絕轡之野。《藝文類聚》六。《御覽》五十五。

黃帝有熊氏，少典之子，姬姓也。母曰附寶，其先即炎帝。母家有嬌氏之女，世與少典氏婚，故《國語》兼稱焉。及神農氏之末，少典氏又取附寶，見大電光繞北斗樞星，照郊野，感附寶，孕二十五月①，生黃帝於壽丘②，長於姬水，因以為姓③。以土承火，位在中央，故曰黃帝④。龍顏⑤，有聖德，受國於有熊，居軒轅之丘，故因以為名，又以為號。與神農氏戰於阪泉之野，三戰而克之。力牧、常先、大鴻、神皇鉅封直人鎮⑥、大山稽、鬼臾區、封胡、孔甲等⑦，或以為師，或以為將，分掌四方，各如己視，故號曰黃帝四目。又使岐伯嘗味百草，典醫療疾，今《經方》、《本草》之書咸

出焉。其史倉頡，又取象鳥迹，始作文字<sup>⑥</sup>。史官之作，蓋自此始。記其言行，策<sup>⑦</sup>而藏之，名曰書契。黃帝亦號帝鴻氏，或曰歸藏氏，或曰帝軒。吹律定姓。有四妃，生二十五子。在位百年而崩，年一百一十歲<sup>⑧</sup>。《御覽》七十九。

①《尚書·序》正義引作“二十四月”，《藝文》十，《初學記》一，《路史·後記》并引作“二十月”。②《御覽》百卅五引此，下注云：“干寶曰：二十五月生。餘同。”按：此則正文當是二十月。③四字依《史記》索隱增。

④三句依《五行大義》增。⑤《書》正義引作“黃帝日角龍顏”。⑥“神皇”已下，一本作“神農皇直封鉅大鎮”。⑦“孔”，一作“孝”。⑧《御覽》二百卅五引此，下有“之篆”二字。⑨又引作“册”。⑩《史記》集解引作“年百一十一歲”。

黃帝垂衣裳，倉頡造文字，然後書契始作。《初學記》廿

一。

居軒轅之丘，故因以為名。得寶鼎，興封禪，有景雲之瑞，故以雲紀官為雲師。以土德王，在位百年而崩，年百一十歲。或言壽三百歲，故宰我疑以問孔子，孔子曰：“人賴其利，百年而崩。人畏其神，百年而亡。人用其教，百年而移。故曰三百年。”《初學記》九。神農氏衰，黃帝修德化民，諸侯歸之。黃帝於是乃擾馴猛獸，與神農氏戰於阪泉之野，三戰而克之。又征諸侯，使力牧、神皇直討蚩尤氏，擒之於涿鹿之野，使應龍殺之於凶黎之丘<sup>①</sup>。凡五十二<sup>②</sup>戰而天下大服。或傳以為仙，或言壽三百歲。葬於上郡陽周之橋<sup>③</sup>山。《御覽》七十九。

①《史記》索隱作“穀”。②一作“五”。③一作“喬”。

居軒轅之丘，故因以為號。治五氣，設五量。及神農氏衰，黃帝修德撫民，諸侯咸去神農而歸之。黃帝於是乃

擾馴猛獸，與神農氏戰於阪泉之野，三戰而克之。又征諸侯，使力牧、神皇直討蚩尤氏，擒之於涿鹿之野，使應龍殺之於凶黎之丘。凡五十二戰而天下大服。《藝文類聚》十一。

聲禁重聲，衣禁重衣，食禁重味，居禁重室<sup>①</sup>。《路史·後紀》。黃帝夢大風吹天下之塵垢皆去，又夢人執千鈞之弩驅羊數萬群。帝寤而嘆曰：“風為號令，執政者也。垢去土，後在也<sup>②</sup>。天下豈有姓風名後者哉？夫千鈞之弩，異力也<sup>③</sup>。驅羊數萬群，能牧民為善者也<sup>④</sup>。天下豈有姓力名牧者哉？”於是依二占以求之<sup>⑤</sup>，得風后於海隅，登以為相。得力牧於大澤，進以為將。《五帝紀》正義。《御覽》三百九十七。

①按：此是黃帝之教。 ②《御覽》作“解清治者”。 ③《御覽》作“冀力能遠者也”。 ④《御覽》作“是能善牧者也”。 ⑤《御覽》作“二夢之占而求之”。

黃帝以風后配上臺，天老配中臺，五聖配下臺，謂之三公。其餘知天、規紀、地典、力牧、常先、封胡、孔甲等，或以為師，或以為將。《後漢·張衡傳》注。

黃帝四史官：沮誦、倉頡、隸首、孔甲。《小學紺珠》五。

黃帝有熊氏命雷公、岐伯論經脈，旁通問難八十一，為《難經》。教制九針，著《內外術經》十八卷。《御覽》七百廿一。

岐伯，黃帝臣也。帝使岐伯嘗味草木，典主醫病，《經方》、《本草》、《素問》之書咸出焉。又。

黃帝五十年秋七月庚申，天大霧三日。帝遊洛水之上，見大魚，殺五牲以醮之，天乃甚雨，七日七夜，魚流，始得圖書，今《河圖視萌篇》是也。世傳大霧三日必有甚雨，

自此始也。《初學記》六。《御覽》十，又十五，又八百七十二。

凡重霧三日必大雨，雨未降，不可冒行。《御覽》十五。

黃帝四妃，生二十五子<sup>①</sup>。元妃西陵氏女，曰螺祖，生昌意；次妃方雷氏女，曰女節，生青陽；次妃彤魚氏女，生夷鼓，一名蒼林；次妃嫫母，班在三人之下。《五帝紀》索隱。

①依《御覽》百卅五增此句。

黃帝於東海流波山得奇獸，狀如牛，蒼身，無角，能走入水中則風雨，光如日月，其音如雷，名曰夔。黃帝殺之，以其皮為鼓，聲聞五百里。《御覽》五百八十二，又八百九十九。

黃帝服齋於中宮，坐於玄扈。洛上乃有大鳥，鷄頭、燕喙、龜頸、龍形、麟翼、魚尾，其狀如鶴，體備五色，三文成字，首文曰順德，背文曰信義，膺文曰仁智。不食生蟲，不履生草，或止帝之東園，或集阿閣。其飲食也，必自歌舞，音如簫笙<sup>①</sup>。《初學記》卅。

①《路史·後紀》曰：“今商之上洛南有玄扈山。”

黃帝時蠃大如虹。《御覽》九百四十七。

宓犧為天子，都陳，在《禹貢》豫州之域。西望外方，東及明豬<sup>①</sup>。於周，陳胡公所封，故《春秋傳》“陳，太昊之墟也”。於漢屬淮陽，今陳國是也。神農氏亦都陳，又營曲阜，故《春秋》稱“魯大庭氏之庫”。黃帝都涿鹿，於《周官》幽州之域，在漢為上穀。而《世本》云“涿鹿在彭城”，今上穀有涿鹿縣及蚩尤城，阪泉地又有黃帝祠，皆黃帝戰蚩尤之處也。或曰：黃帝都有熊，今河南新鄭是也。《御覽》百五十五。

①一作“渚”。《路史·後紀》三引作“明諸”。

或言故有熊氏之墟，黃帝之所都也。鄭氏徙居之，故

曰新鄭矣。《水經·洧水》注。

炎帝自陳營都於魯曲阜。黃帝自窮桑登帝位，後徙曲阜。顓頊始都窮桑，徙商丘。窮桑在魯北，或云窮桑即曲阜也。又為大庭氏之故國，又是商奄之地。《周本紀》正義。

黃帝生於壽丘，在魯城東門之北。《後漢·郡國志》注。居軒轅之丘，於《山海經》云“此地窮桑之際，西射之南”是也。《周本紀》正義。

天子畿方千里曰甸服，甸服之內曰京師。《御覽》百五十五。

天子所宮曰都。又。

按《史記·五帝紀》索隱曰：“皇甫謐《帝王代紀》及孫氏注《系本》并以伏羲、神農、黃帝為三皇，少昊、高陽、高辛、唐、虞為五帝。”



## 帝王世紀第二五帝

少昊帝，名摯，字青陽<sup>①</sup>，姬姓也。母曰女節。黃帝時有大星如虹，下流華渚。女節夢接意感，生少昊，是為玄囂。降居江水，有聖德，邑於窮桑，以登帝位，都曲阜，故或謂之窮桑帝。以金承土，故曰金天<sup>②</sup>，即圖讖所謂“白帝朱宣”者也。位在西方，主秋令，有光明，居小陰位<sup>③</sup>。故稱少昊，號金天氏。在位百年而崩。《御覽》七十九。

①《後漢·張衡傳》注引作“清陽”。 ②四字據《五行大義》增。 ③十四字亦據《五行大義》增。

葬於雲陽。《路史·後紀》。

少昊樂曰九淵。又。

少昊乃方雷氏所生。《五帝紀》集解。

少昊邑於窮桑，都曲阜，故或謂之窮桑帝。地在魯城北。《後漢·張衡傳》注。

少昊氏自窮桑登位，故《春秋傳》曰“世不失職，遂濟窮桑”。登帝位在魯北，後徙曲阜。於周為魯，在《禹貢》徐州蒙羽之野，奎婁之分，降婁之次。周以封伯禽，故《春秋